

廣東通志


卷六十三

內閣文庫		
函	冊	號
二四一	六九二	三九六九
架	冊	號
		漢書類

內閣文庫		
函	冊	號
二四一	六九二	三九六九
架	冊	號
		漢書類
(八五五芥)		

內閣文庫		
番號	漢	3969
冊數	692 (558)	
函號	291	97

五五八




廣東通志卷第六十三

列傳二十列女

淺草文庫

余嘗怪夫世之丈夫當事變臨利害鼠竄草靡曾
不如女子之貞潔者何哉女德於易為坤其道靜
其性專其道靜故動而有恒其性專故發而有執
其視挾冊決科即欲潤屋肥已而無廉耻色者奚
翅千萬諺云烈女勝丈夫信矣故今采錄皆其處
變有大過人者若夫在室則順父母既嫁則宜家
人有子則慈以教夫死則稱未亡人以終其身是
其職之常也然猶取其表表者焉作列女傳



姚氏女者博羅人居盤陀灣雖世為齊民而女閑於禮義事父母巽順孝敬端居梱內人罕見其面貞淑為鄉族所稱漢河平間卒鄉族於縣東所居立廟祀之

據惠州志修

珠崖二義者珠崖令之後妻及前妻女也女名初生十三珠崖多珠繼母連大珠以為係臂及令死當送喪還法內珠於奩入關者死繼母棄之其子男九歲取之置其母鏡奩中皆不知也及關候搜索得珠奩中吏曰誰當坐者初謂是其繼母取之乃白曰君不幸天解係臂棄之初心惜之取置夫鏡奩中夫人不

知也母亦謂言憐之乃曰此珠妾之係臂也君不幸妾解之心不忍棄而置鏡奩中妾當坐因皆哭哀動傍人關吏執筆書不能就一字關候垂淚終日不能乃曰母子有義如此吾寧可坐之不忍加文後訪訊乃九歲男子內焉非其罪也

元楊維禎詩關珠爭兩死兩死獨誰當關吏不

垂泣青天應兩霜○據太平御覽列女傳元詩體要參修

貞節戴氏者南海熙安人名丹戎士陳南妻也美而早寡事舅姑恭篤同伍之人咸樂其質而有色求者甚多守死不嫁後之聘者告其軍主軍主命之知不得已乃自縊死宋元嘉十六年也廣州刺史陸徽為

立具節坊

據太平御覽續列女傳參修

美人區氏者南海良家子也宋昇明中父金以義士從大將鄧惠真襲豫章賊帥有功入金陵事齊高帝為右武衛校尉會選良家子區氏以美姿儀為美人性婉順事高帝始終寵遇不衰而金亦榮顯官至尹州刺史據太平御覽玉海
陳孝女者博羅沙河人陳志女也志年八十卒而無後女幼痛父哀毀甚矢志不嫁以禮營葬畢乃以其宅為龍華寺以田為祀田令僧世主其祀梁大同二年所司以孝聞女尋卒廣州刺史蕭譽立祠寺側表

曰孝女南漢封為昌福夫人

據惠州志修○按孝女本未如此梁世祠之是

矣而昌福之封何居自神異之說興而孝女之名漸陳孝女矣豈非鬼道勝則人道微哉魏莊渠氏之正祠名佛矣而故宅地方議復豪右奪而有之將所謂秉彙好德者非耶余故首之列女而因以告有司者庶幾孝女之事益明白矣

譙國夫人洗氏者高涼人也世為南越首領跨據山洞部落十餘萬家夫人幼賢明多籌畧在父母家撫循部衆能行軍用師壓服諸越每勸親族為善由是信義結於本鄉越人俗好相攻擊夫人兄南梁州刺史挺恃其富強侵掠傍郡嶺表苦之夫人多所規諫由是怨隙止息海南儋耳歸附者千餘洞梁大同初

羅州刺史馮融聞夫人有志行爲其子高涼太守寶
婢以爲妻融本北燕苗裔初馮弘之投高豐也遣融
大父業以三百人浮海歸宋因留于新會自業及融
三世爲守牧他鄉羈旅號令不行至是夫人誠約本
宗使從民禮每共寶叅決辭訟首領有犯法者雖是
親族無所舍縱自此政令有序人莫敢違遇侯景反
廣州都督蕭勃徵兵援臺高州刺史李遷仕據大臯
口遣召寶寶欲往夫人止之曰刺史無故不合召太
守必欲邀君共爲反耳寶曰何以知之夫人曰刺史
被召援臺乃稱有疾鑄兵聚衆而後喚君今者若往

必留質追君兵衆此意可見願且無行以觀其勢數
日遷仕果反遣主帥杜平虜率兵入瀨石寶知之遽
告夫人曰平虜驍將也領兵入瀨石即與官兵相拒
勢未得還遷仕在州無能爲也若君自往必有戰鬪
宜遣使詐之卑辭厚禮云身未敢出欲遣婦往叅彼
聞之喜必無防慮於是我將千餘人步擔雜物唱言
輸賧得至柵下賊必可圖寶從之遷仕果大喜覘夫
人衆皆擔物不設備夫人擊之大捷遷仕遂走保于
寧都夫人總兵與長城侯陳霸先會于瀨石還謂寶
曰陳都督大可畏極得衆心我觀此人必能平賊君

廣雅卷之三
列女傳
一
宜厚資之及寶卒嶺表大亂夫人懷集百越數州晏
然至陳永定二年其子僕年九歲遣帥諸首領朝于
丹陽起家拜陽春郡守後廣州刺史歐陽紇謀反召
僕至高安誘與爲亂僕遣使歸告夫人夫人曰我爲
忠貞經今兩代不能惜汝輒負國家遂發兵拒境帥
百越酋長迎章昭達內外逼之紇徒潰散僕以夫人
之功封信都侯加平越中郎將轉石龍太守詔使持
節冊夫人爲中郎將石龍大夫人賚繡幃油絡駟馬
安車一乘給鼓吹一部并麾幢旌節其鹵簿一如刺
史之儀至德中僕卒後遇陳亡嶺南未有所附數郡

共奉夫人爲主號爲聖母保境拒守高祖遣總管蕭
洸安撫嶺外陳將徐璿以南康拒守洸至嶺下逡巡
不敢進初夫人以扶南犀杖獻于陳主至此晉王廣
遣陳主遣夫人書諭以國亡令其歸化并以犀杖及
兵符爲信夫人見杖驗知陳亡集首領數千盡日慟
哭遣其孫魂帥衆迎洸入至廣州嶺南悉定表魂爲
儀同三司冊夫人爲宋康郡夫人未幾番禺人王仲
宣反首領皆應之圍洸於州城進兵屯衡嶺夫人遣
孫暄帥師救洸暄與逆黨陳佛智素相友善故遲留
不進夫人知之大怒遣使執暄繫於州獄又遣孫盎

出討佛智戰尅斬之進兵至南海與龐愿軍會共敗
仲宣夫人親被甲乘介馬張錦傘領毅騎衛詔使裴
矩巡撫諸州其蒼梧首領陳坦岡州馮岑翁梁化鄧
馬頭藤州李光畧羅州龐靖等皆來叅謁還令統其
部落嶺表遂定高祖異之拜益爲高州刺史仍赦出
暄拜羅州刺史追贈寶爲廣州總管譙國公冊夫人
爲譙國夫人以宋康邑廼授僕妾洗氏仍開譙國夫
人幕府置長史以下官屬給印章聽發部落六州兵
馬若有機急便宜行事降勅書曰朕撫育蒼生情同
父母欲使率土清淨兆庶安樂而王仲宣等輒相聚

結稱亂彼民所以遣往誅翦爲百姓除害夫人情在
奉國智識正理遂遣孫益斬獲佛智竟破群賊甚有
大功今特賜人物五千段暄不進愆誠合罪責以夫
人立此誠效故特原免夫人宜訓導子孫敦崇禮教
遵奉朝化以副朕心皇后以首飾及宴服一襲賜之
夫人並盛於金篋并梁陳賜物各藏于一庫每歲時
大會皆陳于庭以示子孫曰汝等宜盡赤心向天子
我事三代主唯用一好心今賜物具存此忠孝之報
也願汝輩思念之時番州總管趙訥貪窳諸俚多有
亡叛夫人遣長史張融上封事論安撫之宜并言訥

罪狀不可以招懷遠人上遣推訥得其贓賄竟致於
法降勅委夫人招慰亡叛夫人親載詔書自稱使者
歷十餘州宣述上意諭諸俚僚所至皆降高祖嘉之
賜夫人臨振縣湯沐邑一千五百戶贈僕為崖州總
管平原郡公仁壽初卒賻物一千段謚為誠敬夫人

據隋書北
史參修

李玄真者唐宗室女也於越王貞為玄孫貞第六男
珍子先天中得罪配流嶺南玄真生逢家難懼為蠻
僚所辱遂堅志不嫁為女道士時祖父皆已亡歿於
嶺外雖曾經恩赦而未昭雪玄真進狀曰去開成三

年十二月內得嶺南節度使盧鈞出俸錢接措哀妾
三代旅襯暴露各在一方特與發遣歸就大塋合祔
今護四喪已到長樂旅店權下未委故越王墳所在
伏乞天恩允妾所奏許歸大塋妾年已六十三孤孀
家貧更無依倚詔曰越王事跡國史著明枉陷非辜
尋以洗雪其珍子他事配流數代漂零不還京國玄
真弱女孝節卓然啓護四喪綿歷萬里况是近族必
可加恩行路猶或嗟稱朝廷固須恤助委宗正寺京
兆府與訪越王墳墓報知如不是陪陵在祔塋次卜
葬其葬事仍令京兆府接措必使備禮葬畢玄真如

願住京城便配咸宜觀安置

據唐書修

符鳳妻某氏字玉英尤姝美鳳以罪徙儋州至南海為徐賊所殺脅玉英私之對曰一婦人不足事衆男子請推一長者賊然之乃請更衣有頃盛服立於舟罵曰受賊辱不如死自沈於海據唐書修

虞氏者英德之虞灣人唐末黃巢破西衡州其夫為寨將與賊戰死虞氏躬擐甲冑率昆弟及鄉兵迎戰巢賊遂北虞氏亦死之鄉人徐志道等立廟祀之號寨將夫人祠其後叛兵峒寇為亂禱之輒應或見夫人衣紅率兵而行寇輒驚潰蓋其貞魂義魄猶能破

賊云

據韶州志修

譚氏英州瀘陽縣人曲江村士人吳琪妻也紹興五年英州饑觀音山盜起攻剽鄉落琪竄去譚不能俱與其女被執譚有姿色盜欲妻之譚怒罵曰爾輩賊也我良家女豈若偶耶賊度無可奈何害之據英德志修

謝氏李科妻保昌貴村人也紹興五年度賊入村拘留數日有欲與之牀第謀者謝唾其面曰寧萬段我不汝殉也盜怒剉之而去據南雄志修

劉氏二女南海人家西城之折桂坊母病一女剗肝一女割股奉母母瘳鄉閭感動經畧使龔茂良上其

事且曰考之韓愈零人對雖未合禮然亦嶺海間所

創見者官司籍此以導編民詔特旌表門閭故今西

城有雙闕遺跡焉張詡雙闕行劉氏女髮初蟠母病

焚死可惜一縷股與肝一割肝一割股赤刀技處星

斗寒強母開口投肉液生冤訴天天為泣母坐藜味

病如失鳥乎霸上龍號英殺父

尚欲爭杯羨○據廣州舊志修

李昌期妻何氏東莞人鄉貢士何漢臣女也幼孤十

歲喪母適李門事舅姑唯謹舅姑有疾刲股煉糜以

進疾尋愈鄉邑嘉異之夫逝復能守節足不踰閭隣

嫗尚罕覩其面宋咸淳十年邑令袁慶用為立孝婦

坊景炎二年旌表門閭仍賜束帛元初重建孝節坊

云昌期字時可嘗舉于鄉梅外處士春叟子也永嘉

嗚呼人有不愛其身起親疾於垂死乃以不孝律之

成仁親親仁也苟可報罔極之深恩緩終天之鉅痛

身以還父母一念之烈雖通神明感天地可也如慮

其因毀滅性則自古皆有死鮮聞以刲股死者不惟

旌之宜也抑又有說子事父母且弗違而况於人乎

之合以天自強祿已知有父母至親也夫婦之合以

人笄而嫁始知有舅姑由踈而親也事至親而不自

愛其體膚非人情所難由踈而親雖體膚不敢愛此

人情之至難也唐房玄齡妻別曰五代李氏斷臂此

各為六爾史尚夸羽為奇節如何氏為舅姑刲股當

進於房李一等不謂之孝可乎夫逝特世方頑河何

守志堅厲嘗裝遺族女之孤者頃囊笥捐簪耳無斬

色是不特有孝且知有節與義者也嗚呼賢哉

詩亭亭華表荒溪上孝節名高照閭巷聞門至行動

九重致有洪恩自天降人誰無舅姑反唇勃溪將何

廣通志卷之三十一

孝婦傳

七

如人誰無夫婦失節移天紛莫數卓哉賢婦心不與常人同舅姑吾所主良人吾所從於此尚無情天地何處容高堂嬰疾吾憐側割股為糜克藥食股肉猶可生舅姑難再得此身豈忍為親借一朝疾平百憂釋良人早逝身無依悲號不是傷春啼寒燈伴機杼夜雨愁空閨寧死不作他人妻山石可轉心不移吁嗟孝節有如此扶抗綱常厚倫理矧當末世風俗頹婦中却有真男子小人紛紛當愧死○據東莞志修

王康臣妻靈山人姓劉氏貢士劉顏之女孝事舅姑同天割股以療舅疾郡守奏立旌孝坊表之據欽州志修

龔自立妻張氏樂昌人嘉定三年柳寇過邑張與自立擁負二子匿林莽中為賊掠脅男女數十百人魚貫而行張與自立訣曰妾事君子五年不幸罹禍所憐二子尚幼幸善撫之乃給賊曰吾渴欲就飲可暫

解我縛賊從之遂投江中群呼自立曰汝婦溺矣自立躍而乞救賊罵曰彼不我從汝往救即殺汝縣令江武以事白于提刑廖德明郡守方信孺創祠祀之

據韶州志修

陳烈婦者東莞士人李順妻也事舅姑孝謹生子佳而孀守志教子俾知何學宋季少帝自閩入廣駐蹕岡州陳遣佳應勤王之詔臨別與之訣曰汝宜竭忠事主勿以老身為念也佳既行陳亦趨廣至黃木灣赴水死而佳不知及至匡山得潮郡教授還家拜母不見哀隕莫及乃築望至堂于烏沙之陽以寓終天

無涯之悲聞者兩傷之

陳連精衛詞東海有精衛銜石填海死海枯石復爛此恨

何時已天日山前王氣消北風月退錢塘潮匡山新
稱行在所萬里兵塵漲九霄南海有烈婦能守陵毋
節淚血滿衣裾泣與兒訣別萬古綱常日月明爾當
盡忠吾盡節黃木灣頭風雨來扶胥海口浪如雷此
時孤憤同精衛一墮滄溟竟不回滄溟之深
有時竭烈婦之名應不滅○據東莞志修

羅氏李氏者保昌貴村人也宋末賊掠其村且縱火

諸婦多為所掠二婦相謂曰彼賊徇也我等義不受

辱詬罵弗輟遂一投水一投火鄉人義而祠之據南
雄志

修

周氏南海平步人鄉貢士劉元妻也宋季為強賊所

逼周給之曰當盛服以從賊以為然即投蘭石海以

死後七日屍浮倚于石衣裾整然子孫遂於其地建

祠以祀成化元年五代孫衡重飾之據順德
志修

朱克彬妻周氏者海康人也克彬早死無子周氏慮

不免父母之命強暴之虞且獨生無所倚賴遂死從

夫事聞褒表據元
史修

李氏瓊山人教授林君用子婦友仁之母年二十五

寡奉定中海北憲副阿刺公嘉其節聞于省部表其

門憲副楊伯徵有詩云丹心已化望夫石血指猶存

織文機據方輿志瓊
臺志參修

何氏東莞人適漕貢進士張一龍生一子秉陽甫晬

而一龍卒至元庚辰有黃同知者至邑利何氏貲挾勢欲娶之何氏哀服携幼子行哭于市截髮務面誓死不辱罄其貲求免黃意遂止秉陽壽殤育子寶大為嗣家用弗墜邑人高之以其女弟復以孝節著因謂何氏多賢女云

據東莞志修

王妙璘者海康王谷榮女也性沉靜不事嬉遊及笄有姿色至元間徃蠻寇掠被執將犯之妙璘義不受辱婉言詒之賊驅而行水次遂投水而死

據雷州志修

譚氏者新會民譚仲悅女年十七未適人元至正二年因被土寇父母兄弟離珩與一嫗匿山林中為寇所掠及潭遂投賊去嫗備述其事越八日女父母得其屍於潭中面目如生鄉人慕其貞烈因名其潭曰丫髻潭洪武庚戌建祠于潭側祀之扁曰丫髻廟

據新會志修

唐五妹瓊山唐柏壽女年十八至正甲辰六月陳子瑚寇乾寧唐同從妹走被執至舟中語其妹曰我必不免於辱縱生何顏立於世汝小尚可求生乃給賊曰妾家破親亡將何之乞釋當求以相從賊然之解縛即投江而死從妹以小得歸

據瓊臺志修

趙氏者新會之海晏場趙氏女也適冲金村陳以安

至正壬辰寇亂夫婦俱逃于鄉之銅鼓村以避焉其夫為海寇麥秀實所殺趙氏匿于山林群寇搜獲之愛其少美乃逼以歸趙氏遂以箭自刺而死據新會志修

韓氏二女文昌人父良可長年十八次年十六皆有姿色至正癸巳間鄉民構亂搔掠殆盡時韓氏携二女避於瓊州越數年會鬪師出其伯瑤翁率諸弟姪募鄉兵為嚮導因挈家以復辛丑五月會賊圍擊韓寨兄嶽與伯兄等六人皆鏖戰亡母亦遇害二女奔草莽中循至江側長顧妹訣曰家既破賊至且逼汝能遁聽所往余寧死不受辱妹泣曰母兄既亡惟姊

是依姊誓不生余將焉往於是姊妹潜遁乃携手投

江而死蔡微傳贊曰世之列女多矣見於傳獨以唐竇氏二女為首稱今韓氏二女與竇氏何讓

誠足以勵乎薄俗矣且聞女之先世家相州宋名相魏公琦之後子孫有宦于瓊遂家焉吁魏公之忠勲相業顯著當世今遠代子孫死於節死於事不受其辱寧非先世有以啓之歟惜其事在遐荒不能暴白于天下使人人知之因詳序之且附見其族人事功世業以俟他日國史氏之收錄○王佐詩並帶雙芙蓉出水清且妍黑風撼海岳白日凋嬋娟合浦珠流淚盈田玉葬煙至今流水哭聲似百年前○據方輿志瓊臺志參修

吳氏名貞秀滇陽人年及笄許嫁而未適至正壬申六月柳寇陷城女被執義不受辱溺井死據英德志修

林氏文昌人陳道安妻年踰三十至正甲午陳子瑚

構亂道安陷賊中密與吳真慶等密圖賊真慶恐謀
泄乃潛告于賊賊執道安殺之林往瘞所瘞其夫泣
血盡哀遂啖土哽咽而絕鄉人高其義併瘞于夫之

側據瓊臺志修

兵馬指揮謝敬昭妻者河源鍾陽之女也至正間歸
敬昭年二十八而敬昭亡妻孀居厲節有欲奪其志
者輒抱孤子至道痛哭幾絕誓不再醮至道長從務
副使何真軍溺涇溪妻憫子死非命婦又少寡及生
遺腹孫廉而婦志奪其撫育靡所不至終其身志節
皦如也據惠州志修

何氏新會何村人贅回邑蕭積善為婿至正丁酉八
月鄉賊陳有得首亂殺積善意在何氏遣賊眾環其
居必劫致之何氏度不免乃白父母酌賊眾于堂給
伴者曰吾埋金釵一雙于井傍石下吾往取為飭伴
者信之投井以死父母出其屍與夫合葬時嫁積善
僅一載耳時人憐而傷之形于歌詠鄧彥良詩地老
天荒亘古今桑
田滄海幾浮沉千年井水無風浪猶是斯人守義心
鄧林詩連岡宿草暗雙墳今古空餘節婦村惟有轆
轤淋上月夜深猶照井
中窺○據新會志修
郭氏直順者潮陽周伯玉妻也少穎敏父教諭訓以
詩書博通五經旁及諸家子史尤精於數學長於詩

文偶有作伯玉輒焚其稿曰此非分內事也子三磻
彥敬礪彥作礪彥器皆以字行分授三經暮夜列坐
其前各與銅錢百文前置銅盤讀一遍則納一錢盤
中雖能精誦必期錢盡乃已厥後三子皆成名居常
謹慎適櫛縫伯玉偶自外入真順佛然曰君子將上堂
聲必揚妾方散髮失容公卒然至使人窘迫難避何
失理也伯玉謝焉伯玉號齋堂語言德行為時所重
得從祀鄉賢內助之力居多時丁元末之亂人相誅
戮投于寨寨衆推立伯玉為主真順止之曰矜能輕
敵者匪殺則亡寨衆有是焉若勿往伯玉曰吾先諾

矣何可復曰若稱疾吾有以對之爲間塞眾果來直順
曰伯玉淺福難勝大任雖欲勉從諸君厚意忽呻吟
在床褥矣在寨日夜索綯人莫喻其意未幾寨被敵
破真順乃引繩及其二子皆連綯敵人意其爲被虜
故恕其戮復投溪頭寨迨我朝既定天下勅指揮
俞良輔征討不服寨人不知上表亦在征討之列及
至郭作詩上之舉寨悉宥詩附于後而干戈寧靖卜
築縣前之西地名後池伯玉隱居弗仕三子皆以儒
士被薦得官見選舉表郭氏上俞指揮引將軍開國
之武臣早附鳳攀龍鱗煙雲
參淡蔽九野半夜捧出扶桑輪前年領兵下南粵眼
底群雄盡流血馬蹄帶得淮河冰洒向江南作晴雪

潮陽僻在南海瀕十載不斷干戈塵客星移處萬里
 外天子亦念遐方民將軍高名邁前古五千健兒
 猛如虎輕裘緩轡踏地來不減襄陽晉羊祜此時特
 奉時王恩金印斗大龜龍紋大開藩衛制方面期
 以忠義酬明君宣威布德民大悅把菜一笠誰敢
 奪黃犢春耕萬陸雲霓夜卧千秋月去歲壺陽戍
 守時下車愛民如愛兒壺山蒼蒼壺水碧父老至今
 歌詠之欲為將軍紀勲績天家自有麒麟筆願屬
 壺民歌太平磨豕婦莊氏早歸彥敬有淑德因遭亂
 崖勒畫韓山石將入冗以竄莊氏嫌男女塞肩親踈混雜不肯入彥
 敬曰不猶愈於驅虜之辱莊氏曰君疑我乎遂引刀
 自刎彥敬大慟仰天矢曰太平若忘此人天當厭之
 後竟不娶故無後至今子孫遵郭氏遺教喪不供佛
 祭不焚楮云

據揭陽志修

胡氏華亭人從夫高文貴為海南衛右千戶吏洪武
 壬戌文貴邁難卒氏年三十焚柩骨以葬誓守不緇
 教子誼能承父業為諸帥守所重楊升嘗為作傳及
 知府王伯貞跋傳美之

據瓊臺志修

萬氏南海人王受祖妻洪武初蘇友輕為亂萬氏為
 官軍所獲獻于南海衛指揮盧諸諸愛其才美欲納
 之萬氏號泣投衣于火諸怒以刃擬之萬氏唾罵不
 輟就死于南門外聞者為之流涕

據一統志廣州志參修

美人屈氏番禺人幼有巖質守廉介洪武二十二年
 選入宮擢為美人奉侍敬謹恩寵甚厚召其父母兄

第詰 闕賜宴錫賚有加復遣官送還嶺南鮮有被

據廣州舊志修

選宮掖者南齊區美人之後僅見此而已

女官黃惟德南海人洪武二十年選入宮命為司寶

初名阿妹永樂初賜今名信任益隆宣德七年乞骸

南歸 皇太后作圖及為詩賜之 皇明列聖御寰宇
偉烈宏謨冠千古

重惟仁化本家邦內庭百職需賢良咨爾惟德女中
士自少從容知禮義一從應召入 皇宮夙夜孜孜
勤迺事昔時黑髮今如霜歲月悠悠老將至九重
聖主天地仁欲使萬物同陽春體茲德意賜歸去乃
心感激情忻忻嶺海迢迢千萬里路河官掉春風裏
賜衣宮錦生光輝親戚相迎人總喜喜爾富貴歸故
鄉我心念爾恒不忘絲筆題其姪女即大學士梁儲
詩意難盡日極天南去鴈翔

之母也亦累贈至一品夫人同時有葉女官者番禺

人少有淑質通列女傳洪武二十四年聞其孝敬選

入宮擢為女官因召其父葉碧山弟葉祖道詰 闕

賜宴俱授錦衣衛鎮撫賚以衣條表裏與免子孫永

遠差役又有王司綵者郡之河南村人永樂二年選

入宮為女官時年尚少權妃方見寵幸特推同輩之
愛固辭曰臣妾嫠婦也安敢充下陳哉 上重之亦
從其志司綵有文學能詩蓋宋昭容之流而持操過
之所作宮詞至今人猶傳誦以為類唐句云 王司綵
宮詞瑤
花移入大明宮綺旒濃香韻晚風贏得君王留步輦
玉簫遶亮月明中○據順德縣志雙槐歲抄參修

子忠甫十月末泰得疾危懼或死有父母存且子幼莫為計以語覘婦曰吾旦夕死然吾家貧安敢以老親幼子累爾哉婦流涕曰君豈病而狂易耶君萬一不幸養老撫孤妾職也妾一移足恐見鄒氏兒為人奴隸乎已而末泰卒寔愈甚甌盞無朝夕儲謝躬力蠶織為布帛易粟以奉舅姑忠八歲使就鄉師學節縮服食以資束脩禮其舅姑不知其貧及舅姑卒鬻所居廬以易櫬櫨行喪治葬務合儀則或問其艱勸以再事富人謝曰我豈不知富人勝鄒氏乎然鄒氏我所安也使我食他人八環九鼎不若飲鄒氏杯水

耳益自操守不少變教其子為儒謝少嘗讀孝經小

學書通達義理故能盡婦道云翰林學士金華宋濂傳贊曰嗜欲之性人

孰能免哉能以禮義制之則不入于邪僻矣婦之事夫當無恙時指天地神明誓生死不相違棄及遇變

故能如其言者鮮矣豈非不達禮義之害哉若謝節婦夫死因厄幾不能為生而處之欣欣然行其自誓

之語如合左券非禮義淪于心能致然邪嗚呼禮義之足以治人也久矣○祭酒樂韶鳳贊曰彛倫造端

夫者婦天貞節或虧四德匪全古道弗振風澆俗敝二三其行恒德實矣瞻茲南雄卓哉謝氏蚤喪其天

堅持節義介三匪轉柏舟興誓服勞奉養訓子通藝天錫茂齡素髮皤皤太史作傳可鐫可歌○教授鄭

貴遠詩鳳凰來南嶽並宿琪樹枝雄雌有定偶中道成分飛孤鳳不恐去旦夕鳴且悲羽翼良已敝志操

終莫移琅玕結實少梧葉無安護辛苦哺其雛飲啄不救飢雛今綵翻長一舉凌雲霓明廷奏簫韶翻

翻乃來儀物情貢自守人事亦若斯陳詩以紀實庶足敦民彞○據南雄志修

程氏海南衛前所鎮撫凱之女年十八歸于賈岳纔
四年一日岳構疾甚憊屬程曰爾少艾善事後人程
曰舅姑強壯嬰兒有託倘不幸我不辱君門戶泣齧
指血滴地誓與同死逾兩月岳果卒程親為殮畢夜
人靜乃潛沐浴振衣整容自縊而死時洪武丁丑也
事聞旌表學士解縉為之傳云據瓊臺志修
伍氏劉細奴妻夫家甚貧未樂十一年偕夫往翁源
縣傭工一日將暮虎匿道傍深草中夫出汲水行數
步為虎所噬伍氏聞之赤手出與虎搏拽夫足而奪
之虎棄其夫又傷伍氏皆死教諭伍聰義其死收養

其孤子而葬其夫婦

據韶州志修

畢氏直隸太湖人年十五南昌後衛指揮屠經取為
側室宣德初經以累謫海南衛前所十戶病劇訣別
畢誓同死經許之歛夫訖乃沐浴更衣上堂辭母母
痛子傷婦兩難其請相抱痛哭左右不忍見俟衆防
少解替入室堅戶自縊而死據瓊臺志修

鄧淑人新興人刑部右侍郎陳鼎妻和懿克相鼎累
官卿亞淑人屢授封誥正統間流賊寇邑淑人被虜
至南城外賊使之跪淑人唾賊大罵曰老賊奴我為
命婦顧屈膝於賊耶復強之曰若稱我為大人即縱

汝淑人忿然曰大人之稱吾夫子當之劇賊群鼠行就刑戮耳賊怒殺之

據肇慶志修

僉事郭觀妻者歸善侯氏女也正統中隨觀任廣西

平南學訓導徃寇劫縣侯與子紹輝俱被掠去至晚

群寇方飯以飯授侯侯不受棄於地寇怒以矛鏃紹

輝死焉仍欲威脅之侯大呼曰狗賊何不殺我使我

母子骨肉一處耶遂遇害事

聞詔旌其烈據惠州志修

蘇氏香山人指揮林興妻也正統己巳寇黃蕭養來

侵城時龍眼里民且附之四境奔潰援又不至時興

統屬軍千外竒專城者束手睚眦孤城危在旦夕蘇

氏率軍婦衣盔甲緣城拒守身親矢石振威退虜城

賴以完

據香山志修

楊氏名妙貞清遠興仁鄉民可盛之女十九嫁邵守

琪為妻守琪連州民也年二十六而蚤死妙貞誓不

再嫁孝養舅姑皆以壽終撫其孤誠領永樂庚子鄉

薦歷官建昌教授正統四年有司以事

聞旌表其

門

據連州志修

湯氏名卯娘新會人父曰應璧應璧者陝西乾州判

官也卯娘年二十而嫁為鄉人馬時寧妻五越月而

被虜賊徒將輿之以獻渠魁卯娘且泣且罵賊怒殺

之時正統己巳也其後天順癸未冬又有龐婦李氏者聞流賊已臨門遂自縊而死弘治戊申九月聞之博羅何宇新曰八月賊臨增城博羅之界婦人被虜者十八人經二夕其家贖還竟無一死者若卵娘者其烈婦歟卵娘死時其間舍垢而不死者不但千百人而已也若卵娘者真烈婦也據新會志修

潘氏順德梁明妻黃蕭養伏誅元戎并殺脅從者明日吾腰領中有寶飾解以相贈從未晚也即投江而死年二十四男女各一人其婢負以逝亦為軍所虜

據順德志修

蕭烈女景恭己巳討叛之後水軍籍一女於香山小欖甚少艾將犯之不可撻以兵刃諷以利害皆不可舟還次新會東亭驛前召人鬻之婦曰願一死軍怒舉刀向之曰聽賣乎無緩我刀婦曰我豈令汝賣人亦豈能買我哉人曰贖汝命送汝還家也不聽自跪引頸歛髮受刀觀者莫不泣下邑人李彥英謝齊祖構錢買棺葬于邑西象山成化辛丑知縣丁積訪遺事始知婦蕭氏名烏頭娘故民蕭思敬女命工修其墓且割廢廟田六十餘畝命人歲守祭祀據香山志修○黃佐

憫烈辭嗟覽山兮差我結瓊枝兮哀歌有兔兮爰爰
雉何為兮罹于羅蕙帏兮椒植繚之兮葯蕪淑女兮
未纓佩珥珞兮象耳芳菲兮若英志皎鏡兮冰雪
氣凜凜兮不可凌生不辰兮兵不戢倏而囂兮倏而
突操吳鉤兮如雲抗虹旌兮蔽日恣拘縛兮絲禁熊
罷革兮狗信信冠履兮共約玉石兮同焚朝北渚兮
純束兮東亭兮轉鬻欲髮兮受刃誓死兮冲天觀者淚
不辱兮首離其荼毒兮如飴魂為虹兮冲天觀者淚
今如縻山有木兮條肄特余心兮不移木策策兮風
脩脩鐵金支兮翠旗○何派行詩西風吹血濺戎衣
負骨山頭忍淚時青塚月明帝柱宇綠楊煙淨轉黃
鷄百年俎豆嗟殊上千古綱常耀短碑均盡岡州雲
沒處墓前芳
草三離離

李氏澄邁黃村易周之女瓊山西廂丘傳妻大學士
濬之母也年二十一寡守節無玷天順辛巳有司覈
實以聞 詔旌表其門據瓊臺志修

蘇氏新會之平康里涌翼村張寅妻也景泰初賊首
周二等倚黃蕭養為亂圍其村盡殺寅家蘇有美色
賊酋留欲妻之蘇罵賊赴水死據新會志修
張經妻者興寧詹氏女也天順辛巳山寇破縣治詹
舉家奔竄途遇盜欲污之詹神色不變大罵曰吾良
家子豈從汝耶延頸以待刃盜遂殺之年二十三越
旬日夫求其屍蠅蟻食腐不可辨惟脇下遺珥猶存
乃歸葬之聞者慘怛咸稱烈婦云據興寧志修
鄧氏始興監生鍾鼎妻南岸姚村鄧貴女也天順八
年廣西流賊逼境夫婦被虜賊驅其夫執役見婦姿

廣東通志卷之三
烈女傳
三

色欲汚之婦給賊曰我有白金藏他所與爾共取賊以爲實同去井邊婦抱幼子投井中賊怒下石擊之遂死焉後七日出其屍儼然如生人以爲烈氣所致

據南雄志修

周書妻某氏高州人書景泰丙子鄉貢進士登乙榜

授官至家氏隨書赴瓊山訓導舟次江西遇寇其夫

潛匿他處烈婦以爲死于水矣遂抱其幼子亦赴水

死人多作詩哀之

據吳寬輞庵集修○吳寬詩西江水深浪如屋有婦船頭仰天哭眼

聲遶江江水平至顛一擲鴻毛輕想當汪洋雙淚眼只見良人不見水抱兒語兒兒勿啼妾身不是河伯妻倉皇魚腹期同葬不道良人固無恙良人無恙夫作官妾身雖死心則安願身莫化爲精衛願夫善射

如后羿願身化作金鸞姑一時射殺荏苒徒

陳氏開建民李以達妻以達早卒無子陳守志不二

父母以其年少欲嫁之陳引刀慟哭以死自誓遂止

有司上其事表之據肇慶志修

彭亞光德慶彭智女適劉英天順間流賊潛入州城

劫掠時翁夫俱在外惟彭氏侍姑賊將至姑囑婦曰

吾老不能去爾亟去之彭曰如在此婦何之賊至彭

盡將財物求脫賊見其美色並姑繫之彭給賊曰母

老且病行步苦乏若欲我去當放母賊信而釋其姑

彭見姑去且遠彭乃以頭磕石流血被面連聲乞死

自投于塘水淺不溺賊援之起欲更衣彭罵不絕口賊怒而殺之

據德慶志修

陳秋光德慶陳英女年十九適生員鄧世源源沒陳哀慟幾絕源家貧舅姑慮其失所服闋送歸寧父母欲奪其志復送之夫家陳知之舟至悅城投水而死

據肇慶志修

李清女名蘭香合浦進誠鄉人年十九始有張指揮為其子聘許之後張嗽知女貧別議女聞之曰吾為人所棄如此何顏面更適人遂誓不字後母改婚諭之女泣曰烈女不更二夫吾既見鄙於人願守所志

以終母不我聽有死而已又聞在家從父今父出邊

可以婚事議人耶迨父歸如母議女志不獲伸累縊

不已竟書其夫姓名置懷中縊以死

據廉州志修

柳氏徐聞縣在城民魏乞妻年十八成化元年徑賊

流劫鄉村柳氏被虜賊見其有姿色以車載之中途

欲犯之柳氏設言吾父原是術士有銀藏在某處深

井中引至井遂投井而死群盜驚駭

據雷州志修

屈氏保昌汪仝妻年十六歸仝居十年仝卒子有能

甫七歲姑蕭氏亦孀居家業蕭條勤績紡以資衣食

事姑孝謹既沒以禮葬祭撫育遺孤克底成立孀居

五十餘年成化十一年知府江璞覈實以聞詔

旌其門據南雄志修○湛若水詩皎皎彼雙節潔比

節貞比雙白璧白璧雖云堅可磨他山石姑心如直

照前堂北堂有餘光綱日月同輝煌天章

陳氏東莞人都御史彭誼子忭妻年二十三庠生彭

純妻林氏年二十七有司表為一門雙節據東莞志修

花節婦者王氏夫為廣州衛舍人病死婦哀慟如不

能生甫殯畢即盛服與姻戚鄰里婦嫗訣家人以為

狂其日投井死張詡作節婦詞以表章之張詡詩工

之井清泠泠青天白日精衛鳴高家小女負銀瓶與

爾貞魄同芳馨人去天來今日定千秋名繫朱鳥影
嗚呼犬羊溢踐行春宮海波不湔臘脂井○據廣州
人物傳修

莊氏海康吳金童妻也成化初廣西流賊劫掠鄉邑

人民饑饉莊氏隨夫避難于新會寄寓劉銘家傭以

自給銘見莊氏有容色欲犯之屢誘不從乃謀鄉人

梁狗同其夫入海捕魚因擁下水殺之越三日莊氏

見夫不還尋之海濱有一屍流岸側手足被縛莊認

其衣服乃夫也即歸携其女赴水抱夫屍而沒時莊

氏年二十有二也翌日二屍隨流遶銘之門去而復

還鄉人感傷驚訝其殯祭之然未知銘之殺也後梁

有遺歌○據雷州志新會志參修
游宗裔妻彭氏年二十三蔡廷玉妻吳氏年二十五
彭景忠妻夏侯氏年二十五皆東莞人守節餘五十
年左右布政使彭韶奏奉勘合覈實旌表據廣州志修
南海邵祖德妻莫氏生子康惠未幾祖德死守節不
嫁康惠既長娶梁氏生子智未幾康惠又卒梁氏與
姑皆孀居始終無玷鄉人以雙節稱之智後官御史
梁氏以成化十年旌表制有曰孀居守節教子能
官云據廣州志修
林氏新會之南廂人陳琮妻獻章之母也年二十四

行原籍一體旌表今新會有莊節婦祠云審錄員外郎馮俊上
莊氏事畧曰莊氏生長田野出配蓬門禮義自明非
由姍教遭窘不能聊生隨夫流離異境衣食既資於
人居處罔出於已夫尚存時劉銘梁狗將欲犯之毅
然拒絕不從夫既被害忿劉梁無可奈何慨然抱女
同死事出非常心本無二如此秉德不回奚讓古之
烈女上則感動天地俾三苑流遶於原犯之門下則
興起人心致衆口稱揚於百里之邑儒士作歌吊輓
父老謂財殯埋伏乞旌表以勵風俗○陳獻章題莊
節婦祠此里有此墓千年亦不磨世方逐蔡琰吾甚
敬曹娥淫盜死殊色良人歿逝波江翻練裙帶激烈

而孀居貞德孚聞于內外姑呂氏性端重治家嚴密不妄言笑家人奉其繩約威嚴若神事之二十餘年初不覺其難也成化十三年有司具實跡以聞 詔旌表其門 據新會志修

劉彥愈妻者歸善王氏女也年十七彥愈死妻守志撫遺腹子觀以長成化中知府李叔玉以 聞有

詔旌表年八十三卒 據惠州志修

李道妻何氏順德人年二十一生一子標不兩月而道歿何守志不嫁道母温氏年老頻病何躬調湯藥晝夜不離寢所每焚香祝天祈以身代温後病不起

何整簪珥以營葬事成化二十三年知縣吳世騰疏其事弘治五年 詔賜旌表蠲復其家 據廣州志修

歐陽孺人四會林相妻年十五歸相惠柔孝敬相省父于故城返于途卒歐陽聞之即欲以死從每哀勸

絕而復甦一子世遠所親諷以他適歐陽曰吾忍舍兒女不忍負吾夫言者愧沮成化甲午舅補官上高

召世遠往就學人有以孤幼勿遠遊言者歐陽曰吾婦人不知書亟往萬一有成庶不泯渠父也世遠既

登第令莆田蕪湖迎母就養每戒毋用嚴刑以子貴贈孺人弘治二年知縣丘祥具奏 旌表其門縉紳

作貞則錄以美之少傅姑蘇王鏊為之傳據肇慶志修

彭烈女番禺人本良家子而貧鬻為人義子婦女資

麗性修潔衣裳履瑩淨不垢猶未成婚其主欲私之

不可稍強之即自剄以死嗚呼余嘗讀史至辟陽侯

事歎夫后妃之尊迺或有愧焉以是知女之果賢也

孰謂其賤也而可不書哉女父母聞其事于官知縣

高瑄治其主以罪使治葬樹華表柱于墓焉據廣州志修

鍾氏吳貫之妻南海鍾佛成女也甫十九而嫁未十

月已孕貫之病革誘曰修短有數予死不足惜第恨

二喪未舉倘不虞汝年少異日尚儷他族縱得一孤

吾宗之脉如綫又安能保况產業門戶耶鍾涕泣對

曰君平生好善天道未必不佑萬一有此妾安敢委

其咎而有一心貫之曰若然吾死無憾矣及卒鍾哀

毀踰禮竭力營葬二喪無有遺悔既而產一子昕日

惟紡績自守內外無間言教子及孫皆事儒業弘治

二年二月知縣張烜具其事以聞旌表其門據廣州志修

姚烈女者博羅人密之女也世居公庄崗弘治中寇

李志祥剽其鄉女走山谷懸崖間寇追至欲污之女

厲聲罵曰死賊吾豈為若污哉遂投崖死肌體磔裂

據惠州志修

陳氏昌化千戶所大南屯田百戶陳榮長女贅本衛
前所千戶舍人溫瀾爲婿弘治十五年符南蛇作亂
舉兵破屯執男婦二百餘人時氏年三十五與三男
并女年十三俱在執至途度不免辱遂厲聲罵賊曰
我名家女婦豈宜汚汝大彘遂奪賊刀先殺其女乃
以自刎後二弟珊玠聞之募報者指所死處收瘞其

骸骨據瓊臺志修

鍾氏新會人邑庠生陳雍妻鍾繹女也二十七歲生
一子褫育未及鬢而雍卒鍾哀毀垢面弗飭殯葬如
禮二十餘年居孀守節始終惟一弘治十年旌表廣

州左衛指揮僉事程富妻鍾氏順德人同時旌表陳獻

章詩風俗當年壞一絲直到于今腐爛時欲論
千古綱常事除是渠家節婦知。據廣州志修

陳昇妻者博羅李氏女也年二十四而昇歿時遺孤

方四月也姑憐婦少欲嫁之令里媪潛諭意李呼天

泣誓詞甚激烈自後無敢言遂屏脂澤居五十年無

玷缺弘治中知縣陳暹奏旌其間據惠州志修

張氏昌化孫廣學妻弘治辛酉南蛇賊亂黎賊散出

夫婦俱被執歸崗賊欲釋張他置張正色曰即死吾

夫婦同處而死賊怒出廣學殺之張堅抱夫號哭罵

賊不絕遂俱被害據瓊臺志修

指揮劉禎妻者歸善詹氏女也年十七歸禎一年而
禎卒撫遺腹子全孀居六十年閭里無訾議弘治中

旌表

據惠州志修

蕭氏番禺李宗妻蕭選女也生子綱甫二歲而宗卒
時年二十八或勸其別適抱孤號泣矢心不再天日
惟以紡績爲事及綱長使出就外傳補郡庠生領鄉
薦鄉黨皆以爲有孟母之風孀居三十餘年弘治八
年十二月知縣唐溪奉 旨旌表

據廣州志修

黃萬金妻者興寧賴氏女也萬金死賴年二十五守
志弘治末流賊突劫其鄉見賴而逼之賴給曰汝解

刀即從汝遂奪其刀反斫賊賊大怒呼號黨類支解

之

據興寧志修

曾氏程鄉人良善女年二十歸姚烈甫三年夫得疾
甚篤俗傳人肉可醫曾割股爲糜進之疾愈既而復
作尋卒氏哀號水漿不入口者數日誓不苟存殯畢

遂自飲藥死

據潮州志修

馮氏會同彭裕妻弘治丙辰裕卒馮年二十殯殮畢
遂縊隨死又有何氏文昌何顯女弘治戊午歸田瑤
僅餘四月瑤暴卒何亦 而葬

據瓊臺志修

黃婦方氏惠來縣人隴明村方氏

女年十九適酉

頭都統頭一月而統項卒號泣不絕護棺而卧寒暑不廢及葬令治一壙至遷柩時自縊而死遂停喪事越三日同葬鄉族哀之稱為節婦時弘治十八年八月九日也據惠來志修

馮銀字汝白瓊山那邕都教諭馮源之女博通經史詩文信口而成有古幽閑淑女之風長歸東箱唐繼祖先是繼祖父庸娶陳氏姑嘗病危陳晝夜憂憊至發寢食私自焚香禱天割股和羹以進姑怪其味美食之盡病愈父乃覺莫不嘆婦之孝及陳氏病篤銀亦割股奉姑極其愛敬人以為陳氏孝報云鷄助莫誌界銀

在襁抱中僅能言父教以詩書即成誦稍長博通經史尤隱約深厚嘗自序云昔先人在福建之龍巖而予始生再任江西之新城而予始受詩禮之訓此其在室時大畧也及長歸同邑東廂唐氏繼祖至而喜曰是族風味可人吾歸得所矣動遵家法奉姑陳氏極其孝敬一味之甘姑未嘗不食自奉甚謹而所以奉姑必至姑之精潔甘美凡姑之心所願欲微見其意即順奉必至姑之心悅樂然後已人以爲陳氏孝姑之報常時訓諸子以聖賢之學嘗作遷居序云吾與子觀書至顏子簞瓢陋巷舍書而作曰吾與顏氏之子同儔哉吾雖居於陋巷朝焉命僕以耕則有餘食矣夜焉督婢而織則有餘衣矣暇則與子觀書則有餘樂矣又聞父祖嘗愛山谷不可斷讀書種子之言予實有契于衷不自知其陋也此其言幾於知道者豈女子所能其所作詩尤多如挽父聯云三春花木空青翠千載松楸自綠陰言空青翠則知其無主矣以父無後故云然其言從言自綠陰則知其無主矣以父無後故云然其言從容瀟灑涵蓄不盡餘音此有詩人風雅惜乎不幸爲也○據瓊臺志修

吳氏海南衛人父昇擇婿歸王憲年二十六而寡子宗源甫四齡事翁姑盡孝雖家無奇贏而能勒儉幹蠱守節幾四十年後宗源領鄉薦人以為食天之報云弘治乙卯當道以狀聞 詔表其宅張詡為作旌

門銘據瓊臺志東所文集參修

伍氏增城伍桂芳之女嫁為熊睿妻正德二年十二月賊劫其村為所虜時婦年二十四繫之而逼使行坐地大哭不動賊悅其色樓而欲辱之且罵且斥賊以刀脅之罵聲益厲強起不屈賊逞其忿并其所抱二歲女俱殺之邑里人聞之莫不為之流涕據增城志修

吳義姑瓊山民吳俊妹也俊子誠早孤貧姑年二十四自李寡歸撫鞠如子教以業儒至鬻裙珥克供送之費雖親父母有不能者誠果成業領正德己卯鄉薦姑之卒誠篤恩過毀服喪二年鄉里兩義之檢校王爵

詩好人誰說女中無娶婦未能作義姑從一沒身惟屬李恤孤教姪肯忘吳藁姑玄宇增光燭猶子青雲遂壯圖艷骨百年成麝土高名常並月明孤○據瓊臺志修

曹氏增城曹子英之女正德丁丑女年十七賊劫其鄉女投竹林間賊從之執女手曳之使出女捫竹盜以威加之女度不能自免以頭觸竹而死群盜鬻分之據廣州志修

林氏女文昌人正德初年十四寓瓊山母舅家適舅氏有官犯舉家出避獨女在室隣有素讎其舅者且慕女色因導勾攝者破門執出挾上馬數里初諉以甘言不從繼欲剛犯女自齧其臂血流遍身墜暈於地其人懼急囑攝者送里年扶歸舅遽死據瓊臺志修

邵禧廉者南海人未笄許嫁郡庠生潘濂既委禽矣乃聞濂素病瘵父母欲悔親女執不可私謂所親曰吾聞虛場買物有定錢者尚不食言矧婚配耶事遂尼歲庚午濂以易領第四名文解赴春官中乙榜辭不就南歸病作卒于儀真訃至父母將分梳如潘宅

分梳者定聘後男或死女家遣奠取木梳析而為二以與死者決乃別議婚女死亦如之俚俗所為也女聞之毅然曰梳可作兩斷身不可許兩姓苟若此有死而已哀瘁遽毀家人為好言慰之曰夏溪潘宅門閨素劣濂雖得一第然世有傳屍病今其死安知非福邪女指日自誓以必死是日竟自經時年二十有二家人怒其愚焚而瘞諸路聞者傷之據廣州志修

蕭秀清新興蕭能女未字正德間被賊擄去其父懷全往贖賊私議奪其金而不歸其女女聞之自度不得脫私謂其父曰此銀可還聘禮賊必不我釋我寧

死不辱父潛去賊携入山將辱之秀清觸石流血賊怒遂殺之父復往贖至則秀清死矣督學副使蔡克

廉扁其門曰烈女之門據肇慶志修

李宣女者興寧人也受聘未婚死鄉富子求為妻女號泣欲死父母詰之對曰已受其聘即其婦也烏可

貳志願以養父母畢此生矣父母從之年七十三而

卒據惠州志修

陳某妻者海豐吳氏女也夫早歿舅姑頑陋欲令再偶吳堅拒不從久之恐不免遂縊而死據惠州志修

王氏名世貞電白人王祖孫女年十六正德十二年

猥賊流劫被虜賊見貞姿色欲污之貞呼天大慟不

從衆皆泣下至晚渡江貞投水而死次日父母得屍

面色如生至今雨夜漁人猶聞哀聲云據高州志修

彭掌珠者海豐訓術賢之女也賢病蟲父之莫治掌

珠憂惶顛天割股和羹以進賢啜之病愈女幼許婚

于陳而陳窶甚賢悔欲易之女不可竟歸陳其賢如

此據惠州志修

林婦王氏朝陽人崇鳳妻墮流賊營中欲犯之不受辱賊欲丹其嬰孩王曰此幼無知待哺乳焉時有嫗

得釋遂以子寄曰為予還夫予就死矣遂遇害據潮州志

修

黃佩妻者和平謝氏女也正德中賊張文昌掠鄉聚妻携女走賊逼汚不從將殺其女極口罵賊并殺之

時年十九據和平志修

徐嫩妹者和平人昇女也年十六張文昌之亂被執

賊美其姿容欲納之不從賊佯殺人以威之女延頸

俟刀賊不忍殺多方誘之罵賊益厲遂遇害據惠州志修

古婦黃程鄉人王安妻年二十孀居善事舅姑克守

節操正德間賊首李四仔擄獲欲汚之黃罵曰吾守

節若干年矣今肯為賊汚耶欲殺則殺大罵不絕聲

賊遂殺之七日面色如生人以為神遂瘞其尸而葬

之據程鄉志修

陳氏潮陽人吳喜妻正德十四年賊首曾鈺頭等流

劫陳被執賊欲汚之極口叱罵賊以刀脅之陳曰吾

有死耳刃何足云罵愈熾賊怒遂刃之慘甚具在同

知林廷模作碑文紀之據潮州志修

全氏揭陽人林廷明妻年十七克盡婦道值寇起挈

家避之既而賊進囑夫扶母携幼先之竄匿比遇盜

執欲汚之遂自刎而死越四日賊退夫收其屍如生

邑宰表其宅曰貞烈據揭陽志修

新會盧氏者不得已而投江死者也盧先祖與隣合紗
召工織之盧之夫有所往工以鄙言挑盧盧變色斥
之他日工謂隣婦曰汝能爲我達意盧深相謝織錢
不復言也盧聞之至工家求一死不得屢請於夫爲
白之夫素怯又畏工之無賴而力不相敵也不與較
盧懷抱怏怏若不容於世者遂投江盧華萼東村人
年十六而嫁爲林宗婦慎出入里人鮮識之二十五
而死於乎廉耻道喪世之號爲士大夫者貪昧隱忍
喪其本心者多矣此婦以一言之不可不較而卒死
之朱文公謂屈原之忠忠之過者也予亦謂此婦之

耻耻之過者也錄之以爲無耻之戒

據廣州志修

楊女金惜揭陽人時海寇魏崇輝爲亂劫掠民居金
惜逃竄爲賊掠于舟金惜不受辱投水死兵備毛吉
督兵目擊其事立石碑于里以表之

據揭陽志修

張氏程鄉人生員葉綱妻孝事舅姑處妯娌和睦無
猜夫遘疾焚香叩天求以身代及卒以遺腹未即死
子育七月遂不食而死時盛暑家貧衾歛未備越七
日晷無變色人以爲貞節所感

據程鄉志修

許氏者新會人許仕傑女也嫁爲李伯亨妻嘉靖壬
午古兜盜發許被掠一子在抱盜悅其色將逼之以

行許奮罵不屈賊怒殺其子焉益其遂殺之巡按御史聞而列其名於貞烈坊云

據新會志修

徐亞孫者海豐人于明女也年二十三未嫁為海寇所虜女義不辱罵賊賊怒遂支解焉

據惠州志修

包廉妻岑氏名惠聰合浦人太學生岑珠之女年十八歸廉甫三歲廉以弘治十七年舉人就業南雍卒

氏年二十三誓無二志至老冰操愈勵嘉靖初御史蘇恩表其閭女子嫁為王世麟妻年十七世麟死亦

能守節如其母云

據廉州志修

周氏順德何福餘妻年二十七生一子居二年福餘

死守節不貳何積五喪周竭力殯之孀居四十年人無間言年六十八有司奏

聞旌表

據廣州志修

謝氏新會李伯謹妻年二十五而伯謹卒謝杜門不能修婦道稱未亡人者六十餘年有司以聞

表其門閭

據廣州志修

簡氏新會潮連人簡一女也嫁為唐明妻性端潔不苟因采麻郊外新民劉惟芳悅其色將迫奸之簡奮

罵不從遂遇害兵後僉事李文鳳遣人致祭聞者咸嘖嘖曰節婦節婦云

據新會志修

朱氏文昌邁嶺都民韓機訓妻年二十寡遺腹生男

韓玄儉氏撫養長成娶婦葉氏方生一孫未幾男孫相繼歿歿姑婦相依爲命共守艱貞朱氏年逾七十而死家甚乏不能具棺賴葉氏操志尤敏貸棺裝載日夜不忍離側號慟震地鄉人哀之修呈官司給銀埋葬

據文曰續志修

何氏高明何昇女年二十一適庠生嚴壘生一子贊甫三歲壘故何年二十五自誓不二事姑守節孀居四十餘年有司奏旌其門壘弟素妻莫氏高明莫謙光女年二十一適素生一子貫甫遇歲而素卒莫年二十三堅志守節終其身無玷焉有司奏旌其

門

據肇慶志修

李氏電白人神電衛指揮李信之女適同衛舍人董祐無子越三載祐邁病卒李氏年甫十九孀居事祖姑郭氏姑馬氏愈慎一日姑謂之曰汝年少無子恐悞一生當勉別圖李節愈堅後雷州都司武貴求婚二姑強之竟不可奪自誓有共姜之操守節四十五載始終一轍嘉靖五年有司奏旌表其門

據高州志修

于氏番禺儒士熊廷翹妻廷翹早喪臨終泣曰吾生無名死無聞沒無憾矣獨恨母老子幼妻少難於托付耳于在傍泣曰夫君何言及此也婦人從一豈容

更姓及廷駟死率禮終喪三年之後父母家姑憐其
年少欲令再適干呼天痛哭曰氏前既許夫以不二
今死而倍之不敢也誓志終守事姑育幼深居足不
及中門親儻鮮得見其面者嘉靖辛亥有司覈實奏
聞 詔旌表其門

據番禺
續志修

蔡三娘者新寧之文章里良家女也生而婉淑父母
愛之年十六笄而未歸因寇亂嘉靖元年從父避地
何村為賊所掠蔡度不免乃解衣私與同難鄰婦黃
氏泣曰汝持此歸報我家收我骨吾矢死決矣賊以
牛負之行蔡不從負者六且哭且罵賊乃縛至霍頭

將污之蔡抗聲罵曰我良家女義豈受污狡賊何不
速殺我遂以首觸石流血賊怒殺之僵尸數日面色
如生後黃氏獲釋歸報其家收其屍葬之聞者莫不

慟惜

據新寧
志修

林氏彭睦妻保昌東隅人年十六歸睦甫九載睦卒
遺腹生一子四顧無依家室蕭然杜門不出撫孤績
紡為生或曰家貧子幼守志實難林曰家貧止于餓
死子幼周可以長夫死改嫁是禽獸也自是無敢復
言嘉靖十年林八十二以壽終十三年知縣廖輕奏
聞 詔旌表其門

據南雄
志修

游氏梁氏俱東莞歸德沙甫小家子也梁歸游之兄
孀待年未配游許婚徐三未嫁嘉靖壬辰五月海寇
許折柱掠茅洲抵其廬時梁年十七游年十四曳至
水次賊強污之游奮罵不從遭害曳梁上船不從亦
被殺闕日游父觀保覓得二屍面色如生葬之石鼓
墩鄉人題曰雙烈知縣孫學古暨諸管達咸作詩歌
哀之據東莞續志修

林淑溫瓊山人林繼統之女許嫁于同邑沈家年方
十六未事而沈卒女聞訃矢志自守即日去櫛盟朝
夕哀慟人皆難之有海寇數百人掠其家見女姿欲

虜之女號哭奮身投于海幾死賊赴水擢起見其難
犯乃嚇殺女父母以逼其從女曰辱吾身吾父母亦
何顏於天地遂碎首流血齧舌而死賊見而憐之就
釋其父母而去人皆嘆其貞烈瓊士民僉聞于巡按
御史戴璟勘實命立祠云據瓊臺志修

湯氏新會民執中之女生員魯文鑑妻年二十四而
孀居志不再適母憐其少而無子為受何姓聘湯氏
聞之以死自誓遂屏跡不至母家者數年母知其不
可奪乃還何聘自是益植婦道鄉人賢之有司屢聞
于朝嘉靖十一年八月奉詔旌表其門據新會志修

梁小妹東莞蜆浦耕氓女也生而貞潔躬執爨白不
屑出田嘉靖壬辰賊許折桂掠其村小妹時年十七
曳至船欲污之奮罵不從投海死事平鄉之哀其出
自小家克守志操具聞于官遣老人李山勘實紀于

縣志據東莞續志修

胡氏定安人布政使濂之女年十六歸于進士張世
衡年二十三世衡赴會試離家五載卒於京邸年二
十八而寡嘉靖壬辰旌表世衡子敕妻鍾氏侍郎
鍾芳之女也年二十五亦寡嘉靖丁巳旌表其門

閩據定安續志修

史氏陵水縣生員張鵬翼之妻年二十其夫往廣西
嶺表書院讀書病卒訃聞史氏慟哭屢絕而蘇及棺
至是夜縊死于旁萬州蕭判官及縣學教諭張宿率
父老生員哭祭仍申撫按准為立祠云據高州志修
顧氏增城陳雍妻雍卒遺妊四月生子壽顧年二十
二母憫其年少欲改醮陳婦變色而語曰人之異於
禽獸者以其有信義存焉吾忍以一身踐二庭乎忍
以孤兒呼他人為父乎遂大慟仆地絕而復甦母知
其志不可奪乃止陳婦孀居苦節自勵正德間盜剽
其鄉戒其黨曰此節婦所居慎毋驚犯其為強暴所

廣德縣志卷之三

可守

臣

服如此嘉靖間知縣文章奏 旌其門據增城續志修

李氏保昌汪溢妻年十九歸溢明年生一子二十八

溢卒家世亦貧績紡育子母家諷之再適李曰與其

從後夫以求溫飽不若死爾竟不他適年六十九卒

嘉靖十三年知縣廖輕奏 聞 詔旌其門據南雄志修

黃康積妻者博羅胡氏女也年十九歸康積甫三載

生一子僅六月而康積歿妻誓不改志五十餘年始

終一節嘉靖中 詔旌其閭據惠州志修

盧氏增城人李慶妻早寡守志以終其身教育遺孤

脩有立里人狀其節行上之知縣文章奏 旌表其

門據增城續志修

陳婦鄭氏揭陽人一貢妻年十八歸陳九閱月而夫

卒鄭誓終志及夫葬扶柩至窆所請築一壙以俟免

喪素衣練裙終日一室與姑同寢食曾與母偕舟值

颶作母欲就岸投宿氏曰安有嫠婦可入他人家者

忽遘疾姑欲延醫治之氏曰婦死何足恤所恨者事

姑不及終耳何以醫為遂卒據潮州志修

陳氏增城人生員湯尚志妻生一子而寡有親憐其

少勸之再嫁陳撫其子曰吾許若父為結髮婚姻倘

有背之他日何顏見若父於地下乎竟不二志苦節

自勵鄉黨咸嘉嘆之知縣文章奏聞旌表據增城續志修

張寶妻廉州衛指揮王綱之女名蕙著年二十二夫

寶卒痛哭幾絕既葬乃屏迹不出房闈訓孤子以學

比子輓長嗣祖職以平清遠寇功擢都指揮同知有

司以節婦疏聞嘉靖十五年詔旌其門據廉州志修

儒士方闈妻陳氏南海丹桂人年二十嫁于闈奉姑

張氏孝敬得其歡心夫歿時年二十有八止生一子

大經年方五歲撫孤哀毀盡禮姑憐其年艾許令再

醮陳氏拔髮自誓勵志守節及姑病篤籲天求以身

代姑尋歿自脫簪珥置棺殯葬嘉靖十五年知縣黃

正色具奏奉旨旌表守節九四十八年卒年七十

有五據開具手本修

劉氏崖州城東人生員伍嶽妻因嶽丁酉年科舉渡

海覆舟溺水劉聞變衣毀數日而死撫按旌表其閭

邵郡守贊云遊彼良人膏于魚腹良人逝矣妾生何獨白骨在山精魂赴水抱我良人相為終始○據崖

州續志修

李氏崖州人年十八許聘訓導馮廷器男未嫁而夫

卒李誓不再醮父母不能奪其志哀毀愈切夫喪過

門自縊而死父母憫其志委棺同壙葬之據崖州續志修

陳瑛妻程氏定安人年二十喪夫以有身不忍殉葬

之及育一男慨然曰與其後死而失節不若同穴之為愈也夜自經卒從夫葬據定安續志修

周氏南海人從化學生員蒙天祐妻也弘治八年天祐死時年二十有二遺腹生男鑑父母欲奪而嫁之

周氏矢不再適孝以事姑慈以撫幼賣籍以葬其夫嘉靖十年鄉人以其事聞于御史吳麟委官遣禮存

問十三年鄉人復聞于御史戴璟行該縣具奏旌表據舊通志修

鄭氏番禺黃蓋妻鄭信之女年二十歸其夫越四年而夫卒遺腹生男誓不再適父母欲奪其志遂不歸

寧鄉閭皆稱其節有司日奏旌其門據舊通志修

趙氏廣州右衛右所舍餘王穗妻穗年早喪獨遺弱子道廣守志教子及長充番庠弟子員以嘉靖癸卯

鄉薦為家貧親老授臨桂教諭擢國子監博士有司覈實達于禮部詔旌其門據番禺續志修

陳氏海陽人余廷瀚妻年二十五瀚卒其貧秉節撫教遺孤金鼎既成立亦卒妻葉氏方年二十痛姑少

寡夫無後誓死不二罄力以事姑至七十二而卒葉蔬食二年毀垣屋敝衣服節操愈堅府縣聞于監院

表曰雙節嘉靖十七年 詔旌其門據潮州志修

何文臻妻博羅蘇氏女也年二十七生一子典數月而臻歿妻抱典泣曰吾非不能以一死從夫子吾死奈何氏之祀何廼刻厲孀守蓋五十年而典以母教舉于鄉嘉靖中旌表

據惠州志修

歐氏茂名人歐惠女府庠生吳瑛妻瑛卒時年二十四孤貧幾不能自存乃矢志守死雖幼童不容入戶

一子璉後為漳平主簿嘉靖十八年旌表

據高州志修

莫疑妻朱氏疑以恩平縣籍因軍功授錦衣衛衣中所鑿司冠帶總旗正德十二年疑卒于京邸朱氏年二十有九守節不出閨門訓其遺孤如善無異嚴父

貧苦貞操素聞閭里嘉靖丁九年順天府嚴實氣佳

旌表後如善登進士第官至兗州知府

據順天府劄付修

陳氏番禺馮文俊妻年二十六而文俊沒有四歲子

繼科矢志不貳繼科領鄉誨知建陽縣陳年六十有

六嘉靖甲寅有司奏聞

詔旌表其門

據番禺續志修

陳氏海陽人舉人謝澍妻年二十一澍卒遺孤良相

亦中殞姑蘇在堂不能自給陳為努力周旋姑病癱

為舐癰病目為舐目姑病隨愈鄉人稱為孝所感蘇

壽八十終陳孀居五十九年孫婦二年幼守節蓋感

陳而化者嘉靖二十二年

詔旌其門

據海陽志修

陳氏儋州人生員林維翰妻也嘉靖二十二年維翰應試卒于廣時年方十九舅姑與其父母兩相猜忌

陳氏慮奪其志晝夜哭泣不輒嘗言欲以死殉葬比

維翰喪至遂閉門自縊而死學中師生舉申蒙察院

督學詳允追獎據儋州續志修

諸生陳碩妻者博羅劉氏女也歸碩生一子方及歲

而碩沒妻年二十八廢貳志孀居三十餘年以完節

終有司奏旌其閭據惠州志修

鍾氏高要白土都人適陳積祿生一子甫六月嘉靖

二十四年冬浪賊入境執積祿甚急鍾即冒刃往救

夫獲脫賊因執鍾強欲犯之鍾厲色曰吾有死而已

決不受辱賊怒斷其臂而死年二十有二聞者莫不

嗟悼郡庠上其事提學副使蔡克廉豎烈婦扁以旌

之據肇慶志修

張氏順德張宗達女新會庠生李壘妻也事姑有婦

道丁未盜發破祿峒村掠其婦女張氏被執以死自

誓盜憐其色防之甚嚴至大陂逕欲犯之大罵不屈

盜怒殺之至死罵不絕聲事定里老以姓名聞知縣

王交請於督學蔡克廉表揚之據新會志修

黃氏遂溪縣人石城縣民全祐妻祐卒時氏年十八

哀毀不欲生遺腹生子服滿舅姑父母皆欲奪其志
不可矢心孀居甘貧弗怨年踰五十貞節無玷提學
章拯適按臨本縣知縣黃誥 奏旌其門據高州志修
方住女新會平康里古宅村民方載之女也年二十
未適人嘉靖二十七年為流賊所虜出門即罵賊赴
池自滄死據新會志修
張氏番禺人府同知張翻女翰林庶吉士尚文妻
尚文養病南還卒于途無子時張氏年二十有七聞
喪矢志守節無玷嘉靖二十七年本縣具奏旌表其
門據番禺志修

彭氏南海葉珪妻乃彭燦女也生男純而珪歿時年
二十有三誓志守節事姑潘氏盡禮嘉靖二十八年
知縣黃季瑞具奏 旌表其門建孝節牌坊于蛇龍

村據南海續志修

羅氏始興張綸妻年十七歸綸居二年綸卒沈氏張
絃妻年二十歸絃二年絃亦卒妯娌俱無所出舅姑
欲奪其志二婦以死誓竟不能移羅氏歷年七十有
五沈氏六十有七俱瑩無瑕玷嘉靖間知縣高輔以
一門雙節奏聞 詔旌其門據南雄志修
雙節婦新會古勞都稿頭村人一馮氏鄉民易鶴妻

一劉氏鶴之弟庠生易天準妻也兄弟同居二氏處之甚睦嘉靖二十七年十月同為流賊所擄馮有男劉有女幼在襁負私相語曰今當存者子女耳行至地名倉邊塘給賊曰吾弱質子女在負道路奔趨何以堪之盍緩吾索俾釋子女可便於行賊從之二氏隨釋子女相挽赴水賊以短戈中馮胸立死水中劉抱馮屍俱沉而死事聞縣學覈實申達撫司褒表其門據新會志修

潘氏電白人本衛指揮董廷玉妻偕至英德王以病卒抱屍痛哭三日以髮密結縊死舟中據高州志修

李七娘文昌人李子貴女少失怙恃賴兄李宜春撫養十六歲許聘瓊山黃務未歸嘉靖二十八年十月三十夜突遭強賊數十明火持鋒攻宜春家劫奪財物女被擒義不受辱齧舌求死昏迷倒地賊見其烈不可犯乃解而去頃間蘇醒強謂其兄曰吾今被賊奴所擒不死為何兄及諸親涕泣寬解迄初一夜防捉少緩自縊而死據瓊州續志修

譚氏三水之胥江人黃道夫妻嘉靖三十二年山賊流劫氏奔匿不及為賊所掠渡江至中流給賊渴甚乞縱繩而飲賊遂釋之即併其所負子投水而死聞

者咸義之

據三水續志脩

莫氏新會瀧水都三家村民李家婦也借娣妙以工績紡嘗語人曰我家近古堦賊所往來之衝貧不能避萬一變出叵測吾當不出門死矣聞者皆驚異及嘉靖己酉果為流賊所擄遂以兩手堅抱門限罵賊賊怒以刀斫其齒舌而死鄉人具其事聞巡撫仰本府構文遣官祭之表其貞烈據新會志脩章烈婦海陽蔡伯珪之女其夫章漠為吏赴京授冠帶歸間出遊臨行囑婦以善事老母漠後死于途喪歸婦撫棺慟哭曰君以母囑予予不奉而母以終身

者非人也由是事姑甚恪未幾姑之次女死其長女之婿張元森欲以婦繼妻焉婦持不可元森夫婦入據婦室逼婦於外婦依宿夫柩旁元森乘夜欲犯之婦怒罵之元森等誣訴于姑姑惑女言反嫉婦婦以情立告姑不聽每見輒詬之婦憂憤成疾乃以簪珥歸于姑夜投河中隣婦王氏覺而赴救掖以歸慰解之將旦隣婦度婦意稍解起如廁婦遂持刀自刎隣婦號救之元森起抱婦時婦目尚未瞑瞪視見元森作勢仆地齧其舌以死乍三十鄉里聞之莫不歎息

潮人盛端明為作章婦行

據海州志脩

王氏三女東莞人同產姊妹也嘉靖癸丑劇賊何亞
八剽掠海南柵村破其家姊妹五人遁處一室同破
執其行二者年十八行三行四者迺少二歲皆執義
不受辱曳至水次遽聯袂投水死聞者莫不哀惜爲
三貞詩寄弔焉據東莞續志修

鄧朝觀妻李氏曲江河西人嘉靖癸丑七月羅山賊
掠西河恣其蹂躪驅婦女李素美姿容賊欲污之時
李將逃縛襁于背指堰邊樹下曰必於此驅之至
樹下則復給賊曰勿怖吾兒需解縛可也賊殊不以
爲虞竟負其子溺于塘明日屍浮負兒自若也見者

墮淚李年纔二十二據韶州續志修

馮氏二女高明人馮釁長女年二十釁弟華次女年
十六俱未字鄉人因寇亂共設寨自守嘉靖二十三
年會寧派賊千餘肆掠攻其寨將破釁妻李氏謂諸
女曰賊勢太盛必不能守若等安可辱賊手乎長女
抱母而泣口我文流也使被辱以求活亦復何顏李
氏即躍身入井二女相繼俱死之及寨破賊聞驚怒
出其屍支解焉數日家人斂之面色如生聞者嘆息

據肇慶志修

陳善娘新會歸德都外海村陳興伯之女也有盛色

嘉靖二十三年正月海寇劫擄下船時年十六誓不受辱賊以威劫之度不免因給賊曰容稍緩相從賊聽之善娘遂捐身投海死後三日其父尋至石嘴海坦得其屍體貌如生通判汪應奎嘉其節為之擇葬地立祠祀之廣州知府謝彬作文遣祭以旌表其貞

烈據新會志修

凌氏南海中隅者民凌聰次女也年十八適同縣平洲堡民梁希賢為妻踰年生子珩踰一月而夫亡時凌十九舅姑憫其年少子幼諷之再適凌矢節不二奉舅姑愈孝舅姑逝凌捐首飾衣服以完殮珩長為

順德掾故遺孫源八歲凌垂白撫鞠之部使者覈實

奏聞 旌表嘉靖三十二年卒年九十五據南海續志修

湯婦鄒氏饒平人誕妻越月而誕卒鄒哀設如禮水

漿不入口者三日誓無一事舅姑以孝孀居十餘年

人無間言一日以父疾歸寧舟過鴻溝颶發知不免

乃起拜曰此天所以終吾事也時年二十九三日浮

尸如生鄉人竒之據潮州志修

尹氏增城尹仲美之女歸于丫岡姚肇會進士珩之

孫也完聚一載夫患痘疹尹憂形于色遂輟粒食者

數日朝夕撫視其夫不忍離側及夫危篤呼其兄嫂

託以孤女呼尹命之曰汝年少不宜守善視後人尹
垂泣自誓先死以明厥志母勞飲恨頃之夫病益亟
尹度決不能活大慟數聲密恃其孤付謹厚女僕以
衣一襲酬之囑曰善視吾女幽宜當以相報遂自經
于寢所次日夫亦逝云鄉里聞之有流涕者知縣盛
賚汝有扁表其家

據增城續志修

曾觀祐妻陸氏南海人年二十一而寡遺孤子表甫

一歲嘉靖中旌其門

據番禺續志修

論曰於乎臣之事君女之事夫一道也不易其志之
謂貞不辱其身之謂潔既食漢祿而北面篡賊以自

污莽大夫楊雄是也臣受君聘拜自獻其身矣而改
事他姓則不足以爲純臣宋進士吳澄是也二人者
雖名爲大儒世猶非之顧風俗薄惡弁髦視其夫郵
置視其家朝衰麻而莫燕婉者世亦多矣乃恬不之
懼何邪蒐羅往牒若博羅姚女之淑德朱厓令女之
狗義陳志女之盡孝虞夫人之殉國志咸漏焉是安
可遺也乃首綜其事他如從一而終者自陳南妻戴
丹以下遇寇而死者自符鳳妻玉英以下蓋亡慮百
餘人而有功如洗謀國孝於親及舅姑如劉女李婦
豈非難哉至於慈節炳耀爲有司所褒而未獲詔

旌者難以悉書然郡邑志乘則已有傳云又嘗揆之列女始傳於劉向而懷羸事重耳楚平王奪伯羸亦書焉則非所謂不改其志矣史有列女始于范曄而蔡琰始適衛仲道此沒胡中生二子而歸為董祀妻則非所謂不辱其身矣吾廣在宮掖者區美人輩並有含章之德王司綵且堅靡他之守而閭閻下賤貞潔轟烈者尤不可縷數頽視羸蔡特歲壤物爾况大儒如瓊臺白沙之母皆以節操被旌尤他邦所眇見也猗乎禮義之國豈特鄒魯然邪舊廣州志論曰德也惟不汚其身不易其節然後為德於此弗聞雖有他長如范曄所稱高秀亦奚取哉昔者唐武翌時南

海進女子七歲能詩其兄送至京師聖命賦別兄詩即曰到路雲初起離亭葉正飛所嗟人異馬不作一行歸然果婦言平南海盧石娘自幼巧於鍼指能於一尺絹上綉法華經字如粟又能作飛僊蓋以絲一縷為蓋五重中有十洲三島日食胡麻三合唐順宗時以奇文貞憲宗特賜金鳳環以束其腕後歸南海人以為文仙或有見其乘紫雲遊於海上者然果婦工乎南漢劉龔時宮中蘇才人博通經史才貌兼美掩庭以大家呼之劉銀時辛蟾姬李妃善於耕束以妖曼寵然果婦容乎故皆不列於傳所錄者皆所謂不汚其身不易其節者也非取其容工言詞之美而已是故女德備矣

贊曰坤順必貞水柔務潔惟德之行傾城乃哲常則幽閑變則轟烈堅莫能渝白不可涅煒哉管彤粵女奇節



廣東通志卷第六十三

